

四庫全書

集部

欽定四庫全書

皇甫司勳集卷五十三

明 皇甫汈 撰

誌銘

明中順大夫思南府知府王公墓誌銘

王大夫既卒之三年將圖襄事諸孤來乞銘余以不文讓孤泣而固請曰是先人之遺命也願徼一言之辱以慰九原之靈展狀季翁中舍君所撰云大夫諱延素字

子儀別號雲屋姓王氏光祿大夫柱國少傅兼太子太
傅戶部尚書武英殿大學士贈太傅諡文恪公鏊仲子
也其先汴人宋室南遷從而渡江居吳之洞庭東山遂
為吳人大父諱朝用仕光化縣令以良稱自曾至高並
以太傅貴贈如其官榮躋三公恩逮四世乃知佩刀之
授有徵列戟之施無爽克紹祖烈者矣大夫生而厚重
偉丰姿有器識甫冠以太傅三載考績陰入太學恥居
紉袴被服樂與諸生遊太傅方在樞密乃杜門絕不通

賓以謝請謁者曰母以累家大人為也其虔慎如此時
當中葉毅皇倦勤閤瑾竊弄朝政日非流毒搢紳赭衣
關木暴於轂下者以百數太傅秉正嫉邪事每與忤瑾
心銜之以相公望重終莫敢侮稍為斂容褫氣人咸為
公危之尋上疏避賢者路竟遂祁奚之請不失大雅之
哲歸卧東山海內歎其為完人云時長子中舍君窮治
宮室苑囿凡輿馬服食靡不華腴粉黛聲伎充於後庭
玉帛玩好實於外庫將以娛其親公悉屏而不御焉仲

獨沉靜寡慾折節讀父書翩翩然佳公子也相公亦喜
謂成吾清德者此兒矣亡何謁選銓曹太宰為長洲陸
公執其卷曰非王太傅子耶真可謂得青箱之學者即
取父第何有但朝廷盛典不可虛稽昔司空導右軍義
之皆由門第起家著勲簡冊偉然成大丈夫是君家故
物也仕貴及時尚奚待焉適有左軍督府之缺擬銓授
乃以親老求南冀便省問衆益賢之因拜南京中府都
事履任即恪守職司值畿內諸衛所類進表箋詣府多

冗費一切裁革人稱便焉正陽諸門官軍領鎖鑰恒夜
候風雪中行視憫焉捐俸葺廡以庇之此何異陞楫郎
得休居自旃始哉在南都三載多所裨益甲申丁太傅
艱服除補中府尋陞經歷嘗有中使夜呼索阜城門鑰
將出為章聖召醫叱曰禁門一鑰安敢擅啓然事關太
后奈何詰使者言頗驗迺飭踐更卒嚴禦躬導出入旦
日上疏言醫官台用無時不宜處城外以備緩急時嘉
其奏焉舊制都司及各衛所武臣兩月詣京一比試第

其能否懲勸有差邇來監臨者徒以虛文姑息視之法
漸廢弛率為釐正不少假借士卒皆嚴憚參軍矣嘗奉
詔淮揚有司餽遺一無所受丁酉六載考績妣胡氏由
太孺人進封太宜人兩承褒寵實異數云是歲遷宗人
府經歷秩高而事簡銓曹廉其有治材不宜寘散地乃
就闕下拜為思南守歎曰余豈不能奉天子之威德漸
被遠人為良二千石乎母老且病惡忍忘垂堂之戒驅
峻坂之馭耶遂投劾歸太宜人不久背養獲奉終事孝

思無憾矣既除服或勸之仕曰吾有先人之廬足以託
處具區之田足以自給桑麻橘柚之饒足以比戶封而
鄴架之書可以委懷湖山之勝可以展眺人生行樂豈
在一麾五馬間哉吾弟壯且謝秩韜隱從事著作縱不
能附子臧之節獨不媿少游之言乎吾其已矣士論高
之性鎮密寡言笑事必熟思而後行雖造次未嘗失色
於人弘度有容犯或不校亦無脂韋晞世之態少喜臨
書字畫遒勁得太傅筆法間占屬短律亦清逸不失家

風涉獵聞見隨手籍記他日人有忘之者悉為陳說較
若指掌殆今之崔林也居無虧攝強飲食壬戌四月朔
偶嬰寒疾越七日卒距生弘治某年月日享年七十有
一悲哉配陳氏初封孺人進封宜人乃先公卒子男四
並秀發能文長有輔國子生次有夔次有龍邑庠生次
有玘孫男女八人可謂蕃衍矣輔等卜以乙丑十二月初
九日奉公柩厝于洞庭王塢之新阡越丙寅正月初
四日合陳氏宜人兆葬焉銘曰倬彼王裔起自太原居

吳震澤由汴來奔天挺太傅身任斯文扈聖熙載炳耀
台垣兩朝毗化四葉蒙恩邦侯績業亦貴而尊懷金剖
竹皂蓋朱幡踐榮知止膏施自屯誕生哲嗣雖死猶存
阡開幽隧儼對湖濱赫赫中順題墓之門刊石頌烈永
詔後昆

明文林郎浙江台州府推官張公墓誌銘

吳四著姓而張為一若今天台公者其先濠梁人也勝
國時有仕平江路者避偽周之亂徙金陵再徙吳為長

洲編氓自五世祖賜始也賜生彥達彥達生景景生準
世服賈以貨殖聞生子四人並好遊北走燕南走越結
客少年游閒公子日馳逐於章臺狹邪間歸而務然諾
輕財好施能趨人之急則又以俠聞仲子滂字應霖母
李氏所鍾愛也始折節讀書其在燕也鼓篋入雍盡棄
其裘馬之習從博士掌故講同異多所發明為大司成
所知積分考行升諸上舍世廟戊子以尚書古文舉於
順天疇昔五陵諸少年咸指目而訝曰張仲豈久人下

者哉向以鴻鵠困於燕雀中耳自是十上春官竟不遇
乃卷志長林躬理家事稍治第宅葺園囿地僅一區而
池館島嶼之勝備其中花木禽鳥亦相稱自號青陽居
士杜門掃軌以謝貴人惟二三密友時為開徑食不重
味酒纔三行輒罷去乃出所藏書籍圖畫彝罇壘劍
匕罇罇咸千百年物賞鑒之暇則延師訓課其子而已
內而諸從外而子壻各以別舍折券畀之或婚喪不克
舉者咸為周之有敦睦之風焉踰三紀歲甲子季冲子

鳳翼燕翼並舉於應天里中謂古有三戟張家將復見於今則又駸駸乎以顯聞矣乙丑春忽戒其紀綱曰為我趣裝將謁選于天官氏人莫知者先是嚴相公為司成時嘗拔太學俊異者得馬氏一龍從謙輩十有一人隆禮以優之仲益與焉後登上第者九人嚴既柄用凡受知者趨之多得巍科腆仕仲獨謝去曰吾寧不仕豈可以權貴致身哉相國敗始有此行或以其事寢淫聞於秉銓乃拜台州理官遂自號天台仙吏而人稱曰天

台公云時侍御龐公尚鵬按浙之命甫下持憲良峻大
署其門屬吏母得上謁天台公徑造其門閤人止之乃
排闥而入御史驚而進之庭參未已遽升其堂曰未嘗
為吏不識吏局然下僚謁長官承問治道亦禮也胡深
絕焉御史斂容而謝京師傳以為美談視脂韋磬折足
帖帖面赤汗背者何如哉不疑之諭暴公子天台近之
矣將之官過里中猶攜諸從獻翼輩為竹林之遊忘其
簡書可畏也移檄促之單車入郡偶觀察使者委以訟

牒而名犯其諱入而作色曰理官與囚名伍豈有意辱之耶觀察引咎謝之其不為屈志媚上多此類朞月之間疑獄多所平反弭大盜之逋捐獎田之罰卻鹽賈之賄俸祿之餘盡散以飾學宮廣浮梁士獲藏修民歌利涉又建正氣樓以祀方正學倉吏耗米將鬻女以償出橐中金代贖之人心咸為感動台郡為之語曰張君為政樂不可支麥穗自昔蔓草在茲以庭虛罕訟獄蕪寡逮擬堪也然同官嫌於伴食郡守甘之坐嘯忌才害能

譽之所在謗亦隨之矯矯者汙不信然哉遂以年免聞
報之日歎曰吾豈不知耄無能為耶聊効一官以見志
耳矧茲地也稱仙都福庭傍郡去龍湫鴈蕩密邇間得
馮霞御風躡石梁探海嶠吾生足矣昔稚川求丹砂於
勾漏靈運娛清暉於永嘉某雖不敏請附二子矣或占
綴詩篇閒婉可咏也角巾東歸士民遮道車不得行尋
建祠肖像為享祀焉抵家發裝圖書之外惟鵲蕉蘭蕙
數種而已閒居兼屏紛雜闢園濬池崇臺綺閣覽衛生

之經談緩齡之術仲長眷懷於山水馮亮廣適於栖遊
殆未涯也忽膺痺疾涉旬而卒隆慶己巳正月晦日也
生弘治丙辰十一月二十八日春秋七十有四配沙氏
相夫以才淑克昌厥家沒齒敬慎不衰男女各二長鳳
岐娶陸氏次鳳儀娶徐氏皆太學生孫男二天台公病
方革無他言惟曰我即不諱鳧鳧猶思越鄉昔人託葬
南陽台人豈不能血食我耶卒之後果有屬吏素車白
馬千里臨哭者悲哉彌留之夕召獻翼曰汝吾家千里

駒也為撰述平生乞銘於司勳氏彼雅善文又汝忘年
交也獻翼泣曰唯唯是歲鳳岐輩卜以十一月十又幾
日即遠于伏龍山祖塋之傍遵治命具狀來請夫張子
藝苑名流得馬遷叙事法且所聞於家庭固溢而徵余
奚加焉聊刪次而系之銘曰張仲務學克振儒風肇由
俊舉恥以背雄避權謝仕韜光固窮晚效一官烹鮮愈
治爵服匪榮聊展吾志民號神君自稱仙吏不習塵容
引年解紱樹碑留思建廟享食官豈在崇民懷惟德伏

龍嘉麗卜宅安靈赤城遙緬騎箕鞭霆餐霞吸瀝安知
委形

皇甫司勳集卷五十三

欽定四庫全書

皇甫司勳集卷五十四

明 皇甫汈 撰

誌銘

徐隱君墓誌銘

隱君姓徐名京字禹量中山武寧王七世孫也余嘗誦
高皇帝御製碑為鳳陽府鳳陽縣人家世農業王益羸
糧徒步仗劍崛起晞竹帛以垂勲誓河山而疏爵者也

自是紉袴子孫憑藉寵祿炫奕陪京無踰魏國家者延
至中葉始知說禮樂敦詩書彬彬乎多儒雅士矣君尤
砥節勵行嗜學綴文乃知太沖起於公族靈運誕自侯
門也祖某號蘭谷父某號慕蘭並任俠樂施降而能珍
母梁氏萬戶安之女也雅有閭儀載在家傳君生而聰
悟甫七齡能為五七言對信口占答慕蘭公奇之使就
外傳年二六能屬文習經義志期以文通武正德丙子
應天鄉比就試京兆尹居首選後累科不第輒棄去曰

此殆非不朽業奚足困壯夫哉遂擬古文詞特開詩賦
不窺家園者十年矣亡何慕蘭公背養居喪毀瘠事梁
夫人撫弟立襄以孝友聞締婚授室推產讓僕自處湫
隘梁夫人慈景無恙由子翕孺也遭辰終鮮兩弟相繼
奄逝殯葬之具身獨經理謀諸細君而鄒氏賢婉脫簪
解珥畧無難色成君懿親之美而君方齊物於蒙莊寄
情於潘岳曠濆恬澹不為貨省雖世濟蟬聯而衣惟緼
繻家崇鼎食而甑或生塵晏如也因號居雲子以見志

馬嘉靖丁亥慕吳越山水之勝為子長好奇之遊訪友
明哲商推藝藻時蔡子羽王子寵黃子魯曾省曾皆與
定交吳趨之市而余兄弟亦傾蓋焉以倚間之故不遑
留滯亟歸寧慶因杜門掃軌覃精遠討力追古人於是
東橋顧公璘暨弟橫涇公璪石亭陳公沂倒屣紆引更
倡迭和而君獨雄轢其間聲稱藉甚於江東矣浚川王
公迂相以大司馬參贊南都機務非公事不濫通賓君
以詩投謁即歎賞不置司馬業上䟽切論時政語侵魏

國君坐是避之不復往來以故臺省鉅卿愈重避君時
海內被褐之士以詩名家者太初流寓於吳會子言棲
趾於燕京而君且度外兩子若未暇參論也將軍西第
履綦響臻公子南池軒騎填集而君門轍跡間有長者
不以蓬蒿見謝也梁夫人尋亦捐背毀瘠踰於前喪謂
生不能崇養三釜產子皆天死無以行一綫之脣居嘗
鞅鞅弗豫矣甲辰歲余在司勳仲氏洵蔡子汝楠施子
峻在北部王子廷幹在戶曹與君數相讌會歡若平生

君為牛首地主邀致羣彥探幽攬勝登頓彌日賦詩盈
帙藏之山中一時傳寫長安為之紙貴越乙巳諸子稍
稍遷去而君疾間作自以志不展於丁年才不效於小
施苒苒聿暮頗有憂生之嗟然苦吟耗心縱飲傷肺客
為勸止之而君猶覓句驚人頌酒詆婦悲哉明年丙午
君於兄弟之子擇其冲秀養為己子曰俾奉先人祀不
乏足矣越丁未忽病風左體委弊不勝動履鄒孺人卧
不安寢食不甘味晝則延訪名醫手調藥餌夜則焚修

秘祝願以身代君瀕危得復起者鄒之誠感所致也又
明年戊申君積病少瘳而予羈紲都亭相見輒歎歔流
涕察其容貌改前鬢髮非故心竊憂之至把臂晤言了
如平日幾其猶可強息也君且悼故友之零落緬陳跡
於俛仰命酒慰勞盡出其稿曰以此累公余因參定蔡
中郎謝司直所芟取者銓次之而為之序君手漸能書
翰期我以中秋之會不數日食鮮疾作余時在長干寺
報書云仙子樓居維摩禪坐明月一室何曾兩鄉十六

日漏未盡而卒嗚呼痛哉臨歿猶令友人誦其序文頷之曰吾目瞑矣小祥之月鄒孺人令其孤來乞銘曰知園典者莫若蔡邕公無辭焉據狀公生於某年月日春秋有幾男二守硯早夭次守筆女一適溧陽翰林院庶吉士馬一龍亦先君故守筆擇某年月日襄事於雙橋門之新阡以鍾山賜地罕可附云君多懿行不瑣述外雖和光而中懸人倫之鑒臨財非義即千金不為眴睞覩時俗事輒慷慨不平至談經世之務抵掌奮袂欲為

陳思自試著隱一書頗懷韓非之憤已矣居雲余忍銘
余友哉嗟乎世謂相知之難而相遇尤難也設有二三
當路知余如君則將職文墨之司無泣玉之寃知君如
余則必蒙弓旌之招備記室之任豈若是輾轉終其身
哉命也已夫君所造有居雲集吳行淞行二稿并著隱
總十餘卷成一家言銘曰有德而文無祿與勲逸情埃
表棲迹孤雲生不滿百千載揚芬一逢吳季二古徐君

黃先生墓誌銘

夫神駿伏櫪而驚駘駘乘蛾眉棄捐而勃屑進御瑜瑾韞韞而瓊甌騰價龍劍蔽室而鉛刀發硎士亦有然者天乎人耶求士若此望世又安得乎吳人于是乎搯腕為黃生矣按狀黃君諱魯曾字得之人稱為中南先生云其先河南汝寧人也宋元兵興間高安公徙家袁州生斌少習孫吳書學擊劍騎射察觀英雄屬馬值徐壽輝破袁州以斌為萬戶尋自偽漢亡歸高皇帝從徇南昌授昭信校尉調禦蘇州遂家于吳君六世祖也生信

信生景暉為武畧將軍景暉生暉始棄武攻文以進士
起家任比部郎決獄三輔以為神明生異號癸菴公君
其仲子也生而穎慧過人癸菴善操其息立致萬金產
析子各千餘君與弟省曾即五岳山人也盡以購書讀
之父為譙讓對曰昔人謂黃金滿籬不如一經矧五車
乎與其饒於貲孰若饒於學乎比部公聞而賢之弱冠
並充弟子員竊鄙時義博綜羣籍探古文辭好竒縱謫
為文閎衍莫能加焉長則方面巨耳脩髯炯目昂軀山

立偉然丈夫也丙子試南畿主司為李公廷相覽其卷
深加歎賞置易第一錄其論以獻不竄一字俾為後學
式云屢上春官不第同年崔公桐時為少宗伯諷曰子
日暮矣時不可失禮曹司務員缺姑屈効一官可乎君
笑而拒之出曰咄嗟崔生安知余之心哉方今專重進
士即才如董賈學擅班揚位躋卿貳勲垂竹帛問之非
由進士終赧顏憾心矣是時抱志不屑謁選者余長公
沖海鹽王生文祿耳嚴相聞之亦願見此三人三人不

肯行天下想聞其風焉癸菴晚年任俠務博有大度苟
不得盧千金捐於一擲無恨也以故家易凋落又廣置
妾媵多生庶子卒無長物君事母王太孺人竭盡孝養
讓其先人之廬以與諸弟而身自僦居委巷晏如也長
兄太學生孝曾早卒撫幼女長為治裝嫁之錢生用商
示以時義獲舉於鄉今為肥鄉令是也性狷介選俗離
羣寡所交遊弟省曾外惟王守王寵耳余兄弟以中表
尤密八子齊名吳趨為之語曰黃家二龍王氏雙璧皇

甫四傑鳳毛鸞翼同學莫敢仰視矣包山徐鱗以藝交
始終稱莫逆焉後遇太學張獻翼即投分歎曰恨得子
之晚也兼以峻直不能容物邑令張舜元苛法於其僕
斃於杖下君為發喪令蒲伏引慝里兒以催科逞侮君
上書李節推士允畧曰一介不取僕之志也倚馬萬言
僕之才也李覽之為歛容卒當侮者罪居父喪郡守胡
公績宗唁其廬就幕次稽顙曰衰經不敢詣公庭以謝
守辭而避之其梗槩皆此類亦以見當時守令賢於今

遠矣己未之春年踰七十猶擔簦躡屨自潞河徒步入
京師其篤如此所著多憤世刺時之篇若令語士役議
枕戈雜言序使服官政必多忠猷毅烈乃竟已矣閒居
弗豫時過其姪姬水城南精舍茂林脩竹觴咏移日姬
水者五岳子也嘗奉安石以遊承阿咸之賞者也是歲
業將北上趨治裝把臂謂曰人各有志余豈智不逮而
父耶益五岳由辛卯舉於鄉亦置詩第一壬辰走京師
觀樂而返後不更往世盡高之亡何君卒方其彌留猶

不忘一第悲哉是為嘉靖辛酉六月晦生當弘治丁未
三月朔享年七十有五云娶徐氏都御史徐公源之孫
繼蔣氏側室趙氏男三長道美郡學生先卒次道貴次
河水俱郡學生孫男三道貴生嘉瑞郡學生嘉德河水
生嘉穀尚幼道貴等卜隆慶某年月日奉公柩厝于靈
巖西麓之新阡踰十年所而後克葬傷哉貧也狀即姬
水手勒粲然華矣然詳於論文而畧於紀事余稍增益
所聞至云文喜左氏莊騷太史得其曠婉詩喜曹謝岑

李王孟得其健逸皆實錄也余復何贅焉而妄人詆其
不嫻於藝何哉白首牖下誦覽不輟鉛槧日操多所校
輯若孔氏家語兩漢博聞漢唐晉四傳唐詩二選仙家
四書大诹小诹錄詩說諸集行於世及隱居北遊閒居
客中諸集散逸頗多蓋襄陽綴不逮意茂陵稿輒屬人
也河水挺濟美之才負紹述之志旁搜博采題曰天中
集徐君序而傳之所謂愛奇凌誕率任天衷蘊藻沉思
獨持氣骨要亦知己之言哉二孤請銘銘曰矯矯黃君

希世奇寶鸞鶯匪羣竿瑟違好莫為之先蟠木登廟伊
誰之愆荆壁委耀原居屢貧孔行卒老夸死馮生均湮
腐草氣吐虹霓塞於蒼昊卜宅靈巖別開京兆辭乏中
郎曷彰有道往矣餘名來斯允詔

皇甫司勳集卷五十四

欽定四庫全書

皇甫司勳集卷五十五

明 皇甫汈 撰

誌銘

徐文敏公繼室淑人郁氏墓誌銘

徐文敏公亞配卒是為誥封淑人郁氏也日月有期遺命孫履貞治襄事諸孤為乞銘狀即公從弟鱗所撰述也系曰淑人彌留時呼玄英玄素泣且訣曰吾疾殆不

起即不起慰我於地下其在墓銘乎銘在文不在官爵
文工則傳傳則死且不朽官爵以眩盲俗耳奚能益地
下人哉夫淑人之言誠善矣媿余小子何敢當乃一再
讓玄素堅請之嗟乎余少從文敏公遊又為公所舉士
也晚通婚媾嘗於門下竊聞淑人之賢分安敢辭稽昔
任彥昇以記室而表婦順於劉碑舒元興以左司而闡
母懿於陶版文果在官爵否乎迴環展誦華而美典而
徵尚何以加焉謹掇拾為之銘按郁氏之先有諱貢者

當周末時嘗相魯傳至青州刺史泰玄始見郡乘徙江
左著籍於吳遂為吳人居吳趨孔道西接金閭甲第鱗
次高閎駢坐郁特雄埒其間國初嚴鈔法與時轉化因
致饒裕父萬挾貲遊維揚間任俠樂交諸少年遊揚其
名至今江淮言郁長公若四豪云淑人生而幽閒莊恪
里中好靚粧奇服輕袿侈袂翔龍墮馬淑人屏不欲御
恥與衆女伍也父母察其相後必貴為擇佳壻踰笄未
字易謂愆期之志非有待於君子乎時文敏公適喪元

配王氏遍召諸媒媼以詢僉曰無踰郁氏者公詰之曰
汝不聞王淑人乎大傅文恪公長女婉嫕才淑閭德無
雙殆難以為匹諸媼哂曰公何得以相門輒少白屋女
也由是委禽授幣如初婚儀迨吉于歸公喜曰向老媼
言展不誣矣時文敏由史館進秩學士主試南畿淑人
相之如京當今上登極之初銳情經術延訪儒流日御
文華緝熙聖學公儀矩端偉音吐洪亮每陳說古帝王
治道天子改容聽焉淑人警雞鳴於昧旦誠燕暱於小

星曰慎母以閨房急朝省也亡何公陟少宰攝選事進
退百官天下想聞其風采未及三載以聖眷覃恩褒封
逮室淑人始膺綸翟之寵拜泥鸞之錫矣公題其堂曰
介福令門人袁表等賦詩以頌盛美焉時皇后方開坤
寧聽陰教詔諸命婦修朝謁之儀既又逮蠶室列繭館
率諸命婦就郊躬桑淑人例得珠纓霞帔旅班行與從
事曳文履於椒塗陪雕輦於蘭綺實成周之異數而先
漢之稀覲也乍舉竟寢談者至今以為榮及公以簡命

日隆漸閱台衮執政嫌於逼已陰諷儉人就闕下上書
媒孽公釁將中傷之禍發叵測公憤懣不知計之所出
淑人曉之曰公第以正自持即勘者召問具以情對天
子聖哲必不惑於讒說已而詔下果得貸僅免公官雖
伯宗聽戒於妻許允受對於婦曷過焉及歸鄉里公鞅
鞅弗豫思行樂適志淑人勸曰公才望為上所知今執
政且去位聞從左右常侍數數問公安知無使者即家
召公令舍人趨治行奈何效楊子幼自放乎里中莫不

賢智其言先是作嬪於室二姑在堂奉事以禮二姑相慶曰孝哉新婦何減王家女耶撫諸子一如已生諸子歎曰慈哉母氏即王妣在無以加此矣御僕媵每有恩凡蒼頭婢子皆曰賢哉主母王夫人殆未嘗死也若夫承廟祀執姑喪佐夫君畢婚媾潔酒漿享賓客勤勞二十餘年福備履綏願違偕老文敏奄忽益弘內範兼綜外政諸子小有缺失召於庭下切責之汝不能光昭徐卿令德獨不恐黜王太傅家聲乎其嚴

憚若此歲時降誕子婦捧觴遞起上壽以未亡之故為
悽然履觴而罷自是子婦罔敢言家慶者平生善自調
頤強食無恙乙丑之春偶疾作綿歷至冬竟不救藥而
卒是為嘉靖四十四年十有二月二日也生弘治某年
月日甲子一週復六矣亦中壽匪促也子五人長玄度
太學生娶吳氏先文敏卒次玄成廕詹事府主簿俱王
淑人出玄英判臨清州事次玄素玄佐俱太學生女一
人先卒孫男九人履貞者玄成子也出後玄度屬當承

重因董襄事云元允德允恭敬中允治玉柱允若並
幼孫女九人一適太學生皇甫穀者余季子也宮詹君
從都下聞訃驚惋殞地痛哭曰曩余本不欲行母命強
之竟令抱恨終天矣不遠數千里徒步來奔槁容柴瘠
室人不識也當王淑人卒時尚在孩提淑人為撫之令
德感人若此宜其為文苑名臣之配屢叨恩渥上罇禁
嚮日給於中厨黃金絲繒歲頒於內帑身共享之子孫
振振昌大厥後富貴殊未艾也天之報施淑人亦單厚

哉玄成等卜以丙寅某月日遷柩於靈巖山之賜塋合
文敏公兆葬焉哀榮亦備矣是宜銘周姜翊祚趙媛昌
宗覽古遺絢炳訓于彤肅肅文敏刑家自躬王謝郁升
如璧獲雙淑人來嬪徽音克嗣靖恭職思周旋從事諭
夫于道迪子以義壺譽夙欽曰惟賢智雖有茵鼎莫永
慈年匪無膏沐豈駐嫠顏叢護萎露拱木萋烟爰昭世
美佑啓宮詹鬱鬱靈巖帝錫之冢生既蒙恩死亦銜寵
昉彼湘君蒼梧是從潛德休光刊銘示頌

明重慶守陳公孫安人墓誌銘

嘉靖癸亥之夏重慶守陳公諫卒安人孫氏一慟幾隕
然猶強息以育諸孤遂構疾至隆慶戊辰春亦卒蓋生
固非安人志也日月有時孤琦璟等將圖襄事而從兄
瓚時為太常卿移書往徵其狀來乞銘展誦其言蓋歎
河雎絕響晨北貽詒德音莫嗣惟妬是聞至肩不遑恤
而宗弗克紹者悲哉於是乎有感於安人之賢也太常
於世廟時為給事上書指斥時政著蹇諤風其言多憤

世之辭類如此按狀安人姓孫氏父鶴亭公某母湯氏
海虞鉅族也安人生而婉嫕稱閨房之秀重慶公自幼
穎脫為鄉校之英考比部公復廉知孫氏女而鶴亭公
亦雅聞陳氏子申之以媒妁遂締婚焉比部公時佐嶺
南歸與妣徐安人為子授宗廟見禮成喜曰所謂佳兒
佳婦此奚忝耶翁姑繼卒相夫執喪紀務協於禮敬事
呂恭人隆娣姒之儀呂恭人者璣母也二姑並幼撫之
及笄為治裝以歸二姑德安人猶母矣初安人因公未

產子蚤夜遑遑為置側室乃生女安人亦自娘女則又求宜子者納之乃告於公癸卯果生二子安人子之不啻已出公心始懌奮於功名遂以甲午舉于鄉丙午遊南雍安人從之金陵庚戌舉進士拜比部安人從之京師三載奏績安人膺封典奉勅命有樛木下逮之辭匪諛也丙辰領恤刑於閩便道攜安人歸冠翟帔霞沬珠綴珩宗黨榮之未及行乃有重慶之命則又從之蜀中公聽外政安人持內範甚嚴固局鑰絕餽獻凡蜀產之

珍屏去一無所好公治理以循良稱安人相之也乃以
儉人構釁再朞而罷事具公誌迨反初服素無贏金安
人脫簪珥以佐饘醢享賓客為公卜夜之娛察其鞅鞅
弗豫則又諭以南榮之誠廣以北叟之言敬通解宦左
顧孺人樊姬進賢實昌楚脣忻戚益同之也庚申季子
生安人則大喜曰無官有子曷輕重哉然公竟以失意
隕身功名之會有不能忘情者矣安人日夕持季子泣
而苦卧柩側素病癖至是益痼忽一夕聞舍中火起驚

走而蹶無俟反風實由神護竟弗救藥悲哉隆慶戊辰
正月十六日也生為正德己巳十一月二日享年五十
有九後夫死甫五易朔耳子三人長琦邑庠生仲璟太
學生季珪女六人適馮者安人出也終安人不廢寧省
無匱母遺如子道云由是子孫振振玉樹之產虞猶德
星之聚穎也安人能知大計矣琦等卜以己巳十一月
十五日遷柩於虞山邵家灣祖塋啓重慶公兆合葬焉
禮也昔子厚誌叔妣陸夫人具列柔儀罔諱爵齒太常

倣之無遺絢無溢辭述而銘之允宜稽昔裨官著姘記
馮荀之家幾履嗣惟孫休休有令美先君之思鼎任只
鳳毛翩翩河東擬攬暉發潛鳴陽起孰謂安人而無子
虞山之灣兆重啓從夫于邁妥幽里千秋萬歲應不死

沈太安人墓誌銘

憲使沈君應魁居母氏程太安人憂日月有時乃衰經
徒跣屆司勲氏之廬蒲伏稽顙悲號涕泣持狀請銘其
墓余亦為歎歔久之發緘申紙狀即太安人從弟鄉進

士大廉辭也事覈而言徵情摠而懿聞有足采者按狀
安人姓程氏雲樓公鉞之仲子也母王氏裔出伊洛兩
夫子後宋德不競於越是遷始占籍姑熟數傳至高王
父兵曹可菴公式正統間以死勒國家無長物而清白
是貽雲樓公昭先令德率迪尤謹教子姓世其業大經
舉鄉薦授昌樂縣令大廉相繼穎脫駿發他日昌程者
此子已仲子幼秉淑姿夙閑女誡授以孝經列傳了悟
大義稱閨秀焉及笄重慶守葵軒沈公海季子似葵公

虞喪其配張安人召媒媼圖嗣張者媼嘖嘖賢程氏云
非此莫能追媼張者以張孝謹有徽音也因委貺焉雲
樓公曰重慶之女先已拜吾宗廟今以吾女往奉公祀
非潘楊世睦乎由是仲子歸於我至則相夫以恪撫遺
孤以恩綜理家政惟密御僮僕婢媵惟嚴歲時薦享惟
裡羞賓客饌饋惟腆似葵公遂亡內顧憂專擇外傳以
訓諸子彬彬為文苑士云晚謁選曹授南京司城指揮
三載考績得貤封其先大夫以歸而二子並舉於鄉因

解組屏居葺園開徑與昆仲遊式敦友于奄忽捐館安
人亦自舉二子矣視之如一凡篋笥所遺庾幣所畜諸
子均析罔有所私斗粟尺帛之謠曷由興耶諸子又皆
申申訢訢有翕孺之樂母氏令善之化也世廟庚戌應
魁舉進士授南京儀部主事將母以行安人享祿養者
三年尋進封太安人嘗割己田贍季弟力為解紛排難
以慰母心無何擢憲廣臬而長子亦拜陳州守尋改趙
州爭相迎養安人以路遥兼遘痰疾並却弗就二子餽

獻省問相望於道安人叱曰汝居官守惟修乃職以報
於君尚安念母乎穎羹陶鮓雖美非吾所甘也憲使以
文學飭吏事赫有令譽竟以直免衆為惜之安人慰之
曰汝年尚壯而才器通達名復雲中收功澠上未晚也
奚鞅鞅為哉趙州亦不習脂韋棄去相與賦閒居於板
輿詠循陔於蘭膳為百年壽奈何昊天不弔朝露溘零
悲哉三子哀慟踰於張安人亦慈孝所感也時隆慶戊
辰六月四日朔其生弘治癸亥十一月十三日年六十

有六矣越歲己巳趙州君等卜以明年正月廿八日遷
於寶巖灣之西北合司城之兆而葬焉趙州忽茹哀抱
疾而卒憲君身獨膺之數也安人雖不躋上壽而享菑
鼎之隆被禴翟之華生既榮矣凡五子長應元即趙州
守次應魁即廣西僉憲次應麟太學生皆出於張而長
於程者也次應賓應龍太學生俱程出皆先安人卒孫
男十一孫女九婚嫁皆望族曾孫男女四殆熾而昌矣
嗟乎安人撫前子寡周而所生子並天此又天之難諶

者也。憲君薄宦，減產斂葬之具，鬻貸以充，可謂孝廉矣。司勳氏曰：余歷觀古史所載繼母之賢，莫踰翟母、穆姜者。程實以之。若事繼母能孝，則王祥、薛包、二子耳。沈奚讓焉。是宜銘。銘曰：婦順匪易，母善其難。愛克致佑，妬乃構患。惟程秉淑，紹張殫義。勗爾諸孤，不我延嗣。天道胡爽？人寵則榮。洵美二室，從遊九京。寶隧重開，金蠶共閔。德音孔昭，芳儀潛翳。

吳母顧宜人墓誌銘

在昔嘉靖癸亥秋七月楚參吳大夫諱子孝一旦捐館
其孤朴乞余表其墓不以余之不文謂余與大夫交莫
逆能詳其素履也迨今隆慶庚午春二月大夫配顧夫
人奄亦捐閭朴復乞余為之銘謂余從大夫所竊聞其
聲也嗟乎曾不踰十年而夫人從遊地下朴慟而慙曰
胡天奪母氏之速夫人瞑焉猶自恨其徇夫之遲也孝
哉賢哉按狀即朴泣血辭也與余所聞恒八九所未聞
纔二三耳夫人顧氏為吳著姓曾大父巽大父暉諸父

餘慶並以辰年擢第起家吳中稱三辰進士者是也父
餘祥少為郡學弟子員學行茂著後生稱魯齋先生云
配俞氏少保公裔也居近閭闔之臯橋夫妻相敬有伯
鸞德耀之風豈居之移人耶魯齋壯未有子生女溫粹
淑哲圖為擇佳壻文端公未第時嘗與同席硯而大夫
甫五齡即能占對魯齋見而奇之曰此兒長為大器尚
惡用他擇乎遂以女許之少長閑習女紅兼誦孝經內
則及通諸史大義魯齋抗行雅遊頗有山水之癖不務

家省夫人能相其母治生得不匱於給事具魯齋遺書
中及歸吳姑薛夫人持陰教嚴肅上能曲盡婦道得其
歡心下則善諷其夫克勤於業大夫嘗賦詩美之辭多
不載當是時夫人尚未有子念舅姑又止大夫一人每
為宗祀之憂因請於薛夫人廣求妾媵遂獲多男之慶
視恒情妬媚何如哉延陵人氏罔不賢夫人者又為魯
齋公置妾亦舉二子武陵人氏又罔不德夫人者大夫
舉進士拜台州理官時文端公解南太宰歸夫人請留

侍養不赴郡舍其事舅暨劉庶姑尤加謹焉間課諸子
講解嚴於父師訓諸女諳婦儀大夫由廣平擢南選部
夫人貽書諷以虞丘之事報曰此吾夙心屈於家大人
未許耳卒上疏乞歸與偕隱凡十餘年始承舅諱執喪
如禮大夫復起儀部稍遷光祿少卿夫人亦不赴京邸
代綜家政為子女畢婚姻視適庶並如己出云光祿尋
擢湖廣參議階朝列大夫提督太和夫人亦不與之楚
臨別第曰仕至橫金於腰結紫為綬亦足矣妾聞讐相

懷私驕子黷賄豈容君等毅直進用乎大夫卒感悟曾
未踰稔乃投劾去吳故世家夫人雖無餉畦視饋之勞
而縞素恬澹昔王凝之妻謂有林下風者夫人近之矣
昊天不弔殲我良人自是居嘗戚戚弗豫遇元旦長至
及生朝令辰子女率孫及甥羅拜稱慶輒謝弗受可謂
永思矣丙寅歲朴以文端公蔭改授南京後府都事圖
便養也值世宗晏駕奉表入覲上䟽陳情乞歸守朝列
家法殆孝養濟美者矣夫人先以夫貴勅封安人今上

登極覃恩都事君奉例欲上疏請贈典而夫人止之曰
汝甫授官未有尺寸之報乃遽徼寵澤乎竟寢亡何背
養惜哉彌留之日召都事君暨諸子謂曰汝先子自少
負拔藻之才晚抱經世之志其擢第也選入翰苑大學
士桂公以其氣俠外補其理郡也屢膺臺薦宜居諫垣
太宰汪公以其雄視左遷海門之寇談笑而弭廣平之
變鞅掌而歲辛卯從事浙闡所取士幾二十人咸拔其
尤若黃中以飭憲稱沈鍊以極諫死一切不言小子識

之朴等泣曰唯唯乃今知大夫怨不為讐德不望報量
益弘矣向非夫人曷從紀哉其他推財好施賑族恤里
婦人恒事夫人踈節並畧而不書書其大者遠者夫人
卒於隆慶四年七月三日生於弘治八年四月八日壽
七十有六男子五人尚朴即都事君尚儉郡學生尚默
尚遜尚潔俱太學生所娶皆宦家子遜潔先卒女子七
人皆適鼎族一嘗刲股起母疾者也孫男十人皆郡學
生曾孫男二尚儉而下非夫人出為夫人撫若已子故

不析其母氏云朴等卜以是歲冬某月日奉棺某山之
原啟大夫之兆而合葬焉司勳氏曰若顧夫人者在文
端公為佳婦在少參公為令妻在都事君為賢母三者
有一焉世以為難矧能兼之是宜銘銘曰婦于文端觀
孝始妻於朝列昌厥裔母於都君迪之義敦善亮節匹
烈士間儀瑣範惡足擬鸞章象服榮宅里從夫委蛻名
不死發潛闡懿詔千禩

明勅封太孺人劉母吳氏墓表

侍御劉君鳳卜宅撰辰奉母太孺人柩合其考文林公
以葬瞿太史氏志而銘之附青雲昭彤管孺人可以不
死矣侍御猶以懿行弘淑宜有表顯於世乃輟哀收涕
采絢述衷以請于余余家司直兄嘗娶於劉為侍御諸
姊而水曹弟又同年也竊聞太孺人壺德久矣及覽述
辭覈而匪溢乃稽古昔若陶母標塋於蠡上虞妃示冢
於湘濱奚必稱夫哉太孺人姓吳氏世以武功爵衛尉
徙蘇父宏夙齡嬰瘵未及拜官而卒母管太君二十而

寡凜有貞操孺人甫晷鞠之孔穉稍長教以女紅誦習
內則女誡諸書性穎慧聽輒了悟由是益觀古今事前
史皆歷歷能道之至論成敗較若指掌丈夫莫踰也年
二九作嬪於劉劉為郡著姓中丞而下繩武科第素菴
數者學行稱於鄉門下從遊之士以百數多躋顯官事
具郡志子鏜為怡晚公鏜子湘為屋隱公並善營積家
用以饒生子梅即文林公也元配俞卒屋隱公每以單
弱恤脩迨吳來歸喜謂潘夫人曰新婦賢而貌具福相


且占曰三五而光子孫其昌天將繁我祚乎俾攝家事
綜理周密就養惟恪姑享其逸而夫亦得以覃精於藝
矣猥遭潘夫人喪哀毀永慕及廬隱公奄背泣盡流血
目幾失明厥後文林公攜之京師庚午舉於順天丁丑
生侍御於京邸時孺人歸劉且一紀矣嘗恨廬隱公不
及見曰嗟嗟胡昔占者之言驗之晚也以產子之艱愛
之特甚丙午文林公拜汀州推官以仁恕明允派其頌
聲咸孺人勸諭之功及調潯州越在嶺外蒙犯瘴癘公

賴無恙又孺人擁護之力也亡何文林公解官還減仲之產居嘗鞅鞅孺人為指侍御曰此子在何患終窶乎盡取篋中簪珥毀以充贍畧無愠色而子果登甲辰進士拜中書舍人恭膺錫命人共榮之乃以管太君貞惠未宣旌典尚革獨不豫焉舍人尋拜南監察御史兩奉祇役衣繡畫行吳市中觀者嗟賞圖展祿養而文林公居忽屬疾孺人食不甘味卧不安寢願以身代竟至委化及竣襄事遂屏華謝飾撤甘持淡翻閱梵典研究宗

因染著悉遣障礙都捐矣以故侍御謫推汀州移貳潯
州曾無忤戚第勉以砥行固志省刑愛民而已雖陶母
之卻餽獻雋媼之問平反曷過焉戊午之冬侍御擢廣
東僉事方以道遠不遑將母欲為投効計而太孺人難
之先侍御在閩中嘗一過汀父老詢知為故推子也扶
杖擁車陳說功德盡皆泣下侍御為之霑巾焉偶與太
孺人燕語及之悲戚致疾又以齋久傷脾飲藥不救而
逝己未二月甲子也嗚呼悲哉向使其子身自之官寧

不抱恨終天即奉母氏偕往卒於塗視閨閣為何如顧
不幸哉或謂孝思開先佛理默相非耶距生弘治丙午
十二月己亥享年七十有四男一即侍御君娶顧氏孫
男思濟女二孫女三皆締婚名閥詳於志中其懿行固
有彰彰足表者矣嗚呼學之於人大矣哉世之恒女惟
習糾組議酒漿差不失婦順而已若吳之性資婉嫕才
哲炳暢動協于禮夫善事親而虔奉以愉乃成其孝夫
素友愛而雍輯無競乃成其讓雖無干外政而從容詆

諷夫為循吏慈矜嚴迪勗子令名凡此節槩皆自詩書
中來也其達權應變輕財好施慷慨有丈夫之風至若
祀先睦族卹隣逮媵閑家儀軌瑣秘不載載其顯者大
者云爾系曰漆室貞媛婦範未臻肅肅饁畦母訓罔聞
斷機遷里徽乏初嬪兼有三善惟吳孺人孰謂男子可
不學云虎丘之陽下從夫君業詮慧鏡報感慈輪爰綴
彤藻永播清芬



皇甫司勳集卷五十五

欽定四庫全書

集部

皇甫司勳集卷

五十六至
六十

詳校官監察御史_臣曹坦

中書_臣劉源溥覆勘

總校官進士_臣朱鈐

校對官檢討_臣李鼎元

謄錄監生_臣祝雯

欽定四庫全書

皇甫司勳集卷五十六

明 皇甫汈 撰

碑表

明資政大夫南京工部尚書贈太子少保何公墓

碑

曾稽之墟實維於越萬陵降神克生英哲迺誕何公爰
振休烈身沒名彰宜表豐碣公諱詔字廷綸號石湖越

郡山陰人也少秉淵懿之資長負穎拔之槩嗜學綴文藻德砥行爲諸生冠遂以明經起家解褐登仕通籍三朝耀組二京歷試郡藩載綬畿甸所在以能稱自分工署迄拜司空翊世平成典邦水土終始懋焉益秦漢以來司空與太慰司徒叅爲三事並超九列亦符舉梁素絲崇袞公無忝已若夫江艘海舸不愆以綜陵工廟役勿亟而集示儉昭朴昉橋山之制踈會通漕奏宣房之績乃增秩賜金錫讌褒璽近代司空未之或有若初出

知永平地隣京輦中官撓法舊莫誰何至則卹灾零雨
廉枉章電民悅慈母囚畏神君嗣莅于楚郴桂告警議
發害積用給軍需民既稱便賊亦就殄廣漢之摘姦孺
丈之持法宋均之徙蝗龔遂之弭盜殆兼之矣由是叅
知西遐則風行百粵稍遷右轄則化偃八閩羣獠內款
罔不即序可謂祗服忘勞盤錯別利者也雖漢史之采
循吏唐典之咨岳牧又奚讓焉至陟中丞持憲三輔整
肅戎務繁殖黎元糾按鉅豪裁罷冗費闢夫敵愾遐方

震懾北門鎖鑰倚公為重亡何徑踐卿佐矣于時識治者謂公宜居樞筦隱憂者謂公宜任韜鈴刺書交薦柄用可期而公知足乞骸遺榮反服暫允歸田之請未寢當宁之眷昊天不弔奪我刑獻海內惜之今上悼焉然星精雖隕而鳳毛不死矣方其立傾否之朝丁履尾之日遏劉襄苗克壯其猷突瑾龔宏卒免於禍大雅保身有如彼既而際亨嘉之會遇攀鱗之代龍蛇互用身名俱優又如此設天假公洪毗金鉉協贊玉衡盛德大業

詎可量哉至若孝友繕性雖睦成風銜哀毀瘠展親翁
孺教篤韋經宦減仲產守萬石之醇謹幾慧度之纖密
疏公罕贏餘之儲行父無衣帛之妾考旋月旦籍甚鄉
評凡茲大節以及世美具載亞相陽峰張公之誌司成
涇野呂公之碑彪炳雲煥垂光霄寓而仲子大中丞鰲
以余中憲先君與公誼為聯榜分則通家屬余甄次遺
絢闡發幽潛稽昔執中為宋名相公侯子孫必復其始
其中丞公乎公之夫人唐氏先公卒卜兆於容山尋

改卜於西余之陽而合窆焉帝給營葬秩贈官保湛恩
汪濊寵靈攸妥堪輿家派謂得善地亮哉徵哉辭媿不
腆而事覈則傳矣系曰漢何武居無赫去見思派遺德
明司空承先則良哉稱二千石曰于藩維方伯暨中丞
揚憲職夙夜寅在公直胡憇遺嗟奄忽經西余筮從吉
山蜿蜒水抱一竄玄廬返真宅鏤鴻勲樹道側居永哀
行者泣於萬年長靡極

明鴻臚通事顧公墓碑

嘗讀太史公世家諸篇乃知尚貴尊賢禮之大經也勾
吳著姓有四而顧為稱首今太保惠巖顧公可學紹肅
侯之家聲挺彥先之人望早歲擢科列郎署參外藩遺
榮恬處幾十餘載值皇上求舊搜隱馳安車之徵賜清
燕之接言每當聖意由是寵眷日隆數歲中超拜禮部
尚書晉秩宮保自父率祖及曾咸贈光祿大夫如其官
世祿之家鮮有踰於錫山顧氏者公有弟為鴻臚通事
諱可文字與明別號惠崖同母馬夫人產也粵自宋季

不競民多南奔占籍錫之芙蓉山高祖福五生壽山善
治生富埒吳中明興法網漸密豪猾易梗有俞慎者聚
而構亂邑遭株染父子逮繫雖獲矜釋而門戶傾圯矣
時大父信尚在韶年匪友人錢氏存下泣之仁念把臂
之誼幾不能全至芹軒公某修業而息之稍復其始與
其弟比部泉州公各訓誨其子誦法詩書繼武科第五
世之後莫之與京謂非天道與善之報耶通事君生而
容貌魁梧性姿倜儻馬夫人知非凡兒愛之特甚而芹

軒公聽其任俠亦未嘗苦為繩檢乃棄弟子員授興邸舍人竟投檄不屑就居嘗敬事長公相與翕孺推衣讓果有李孔之風太保公從宦遠違曰以二親累君生能奉養獨勞歿則哀毀共始輒歎曰有子如弟吾愧多矣東山既起移書召弟促之如京至得改授鴻臚攜入直廬縱觀禁藥之麗日所頒大官醪饌退而燕私都人榮之乃告其兄曰昔吳季札之賢以來聘獲觀周樂為幸漢蘇卿垂希世之節而位不過典屬國余所叨誠已踰

分尚安覲乎懇辭以歸都人賢之太保笑曰君殆諷余
思少游耳公卿大夫聞而賡為詩以贈并為之壽今彙
為集云雅嗜山水之游兼有花癖嘗築別業於城東結
亭葺榭疊石穿池疎篁夾軒叢菊被徑日邀賓朋觴咏
其中夜或寢處花下不知露之霑茵也又構凝雲書院
繚垣飛陛飾以丹漆置蒲滿砌葱蒨逼人因號為蒲仙
性落魄不事家業嘗曰人非無財之難立而無令名之
為患大丈夫不能策足要津以弘功烈胡與賈人攘攘

逐利爭尺寸於市肆間哉家無長物而好千金之施
義所不平而專趨人之急敦睦洽比無小大親疎多蒙
其惠者嘉靖己未歲旱為虐忽病熱流火之月愈煩躁
家兒汲山中第二泉置几榻間滌之始蘇竭則如故而
體益憊矣因歎曰周詩云我心憚暑憂心如薰安得清
風靈雨俾延餘息哉既望四日而卒卒之日無問知與
不知皆為悲慟聲震里中方在彌留言不及家務曰以
余被華食甘乘肥御豔七十餘年志亦足矣子孫並能

文不墜先業更何身後之戀哉第令移蒲菊數本設水
檻以娛魂魄此與魏武上脯構陳妓樂者清濁殊致矣
先配陳孺人繼郁孺人並先君逝長子起經出為太保
公嗣次子起綸為從弟可觀嗣俱官嶺外祇役歸覲躬
視考終二子奚憾哉乃各命一孫斬服行三年喪禮以
義起制由情生君子謂能達權矣太保公敦鞠子之哀
流終鮮之痛手自勒狀不遠數千里請銘於甘泉湛公
墓卜十二月某日懼道阻愆期請余為文以表其墓鳴

呼世如通事君者亦翩翩然佳公子矣嘗擬樂府作調
曲又倣唐音為律詩集行於藝苑雖乏顯位而有令名
宜歌以表之辭曰惟孝與弟行於家太保之言微而匪
誇惟信與義著於鄉無間昆言欲蓋彌彰芳聲籍甚聞
於朝彼都人士式歌且謠積善餘慶垂於後宜爾子孫
克昌以茂恩錫幽隧惠之陽別開宅兆祔以藏表茲潛
德百世永光

明朝列大夫湖廣布政使司右叅議吳公墓表

鬱鬱蒼蒼有山曰陽玄廬帝錫永祔寵光此延陵吳仲
子之墓也曷表之公諱子孝字純叔別號海峰晚更龍
峰自延陵而降世為長洲山塘里人生而穎悟絕倫考
文端公愛之甚五歲占對七齡賦詩敏出過庭美由即
席且機辨響捷長於典謁遂使字父謝愆呼友起敬云
李文正程篁墩並為學士一代偉人文端公時為編修
攜以往見咸深器之至弱冠博覽得於兼行玄思成於
宿構將濟世匡時乃著說守以見志焉隨任留都喬司

馬座客常滿至則盡傾王新建門不妄通見輒嗟晚名
益振於諸生間矣壬午舉應天越己丑皇上臨御之八
年也天下士舉於南宮者三百二十人吾蘇十有六人
公為之首及賜第選為翰林庶吉士上方稽古禮文銳
情經術延攬俊乂殷潤皇猷有若吉水羅達夫會稽楊
汝成陳約之西蜀任少海熊叔抑東魯李伯華上黨栗
仁甫江左唐應德公與余十數子者敷緯國之華摘挾
天之藻雖枚馬之輩相得而快甘泉之遊然絳灌之屬

交嫉而興洛陽之譖矣厥後曹給事數相於闕庭王中
郎忤宰於省闥曾楊二侍御批龍鱗而抗萬言視鴻毛
而輕一死其餘敷歷中外蜚英聲騰茂實者莫可勝算
我明得人於斯為盛矣然不克久奉清班超踐崇品命
之所遭亦畧相似也先是文端公喜業紹於池毛懼途
迫於鐘漏由南吏部尚書乞骸東歸避賢者路哲哉公
初授台州推官便道過吳獲展家慶圖欲陳情奪於父
命而止居台三載擢廣平通判夫以藝苑之英出為理

官以臺諫之器置為郡尉大乖常格人共駭惜恬不為
意恪供職司折獄平反越號神君典牧蕃息趙稱良吏
豈恥視刑案不對馬曹徒守文墨而不開吏局者哉文
端公聞之移書嘉勞亡何以廣平最拜為南文選主事
至則堅請侍養竟蒙予告酬其初願孝哉歸乃竭力娛
親大構別業昉平泉以治園擬東山而營墅臺榭亭館
之華林竹花石之盛甲於吳中罔有踰者鄭莊開驛賓
客響臻鄴架儲書子孫絃誦他若賜金樂施懸車許借

雖文端雅量能成其志者公也里人慕其風曰生男當如吳仲子矣今三賢堂所集後學彬彬向化皆公造焉壬寅文端公八十有三薨執喪毀瘠恤典加隆備其哀榮從公請也乙巳起家補禮部精膳主事尋陞光祿寺丞去羨裁冗著為甲令所減大官之費歲以億計自是寢有列卿常伯之望以性剛毅介直好面折人過兼之持論峻激不為脂韋渙忍忌者媒孽其短政府銜之銓司布旨出為湖藩右參議分守下荆南道提督太和山

公歎曰天台武當世謂福庭靈窟何幸兩為仙吏他日
溘死牖下魂魄當遊二岳間也褰帷行部齋服謁祠暇
則延眺於鹿門致慨於峴首曰龐公叔子獨何人耶太
和歲例出納悉委所司乃稽其贏藉記之權璫斂手錙
銖莫敢私者陰畜憾焉庚戌察吏坐讒免官廉吏可為
而不可為信哉由是浮湘江遵鄂渚下赤壁遡采石而
還如弔屈原懷賈傅諸作辭多不載閉關卻掃葺其先
人之廬觴咏其間家隣虎丘每花辰月夕或杖策攀躋

或操舟沿汎狎魚鳥以留連從林巒而忘返辛壬癸甲
之歲師旅方殷飢饉相踵凡備倭輯盜禦旱防潦臺省
造門咨訪規略多出公議較若指掌賴以輯綏終不自
言家居數載余亦自滇免歸把臂甚驩命酒慰勞相信
益深凡有述造示余商榷評定之玉涵集余所選次并
明珠集皆為之序昔左冲假寵於士安沈約邀賞於元
禮其槩一也追昔彈冠京輦策馬交馳聞鷄蹴起當是
時入思論道於東觀出思銘勲於西域乃今徒以雕篆

為伎鉛槧垂聲即使不朽豈余二人之志哉所期共保
玉體俱享黃髮癸亥之春忽染痰疾步履稍艱言語遺
誤竊為憂之七月八日避暑虎丘再宿疾作返舍危坐
揮藥不御申旦長逝矣距生弘治丙辰正月十一日春
秋六十有九天胡不稍假俾臻古稀也悲哉公配顧氏
封安人所生五子長曰尚朴以文端廕應拜京職次尚
儉郡學生又次尚默尚潔尚遜俱太學生潔先公卒孫
男八人亦皆駿發所締婚媾俱鼎族云公善誨諸子逮

孫並為儒流一洗執習雖竹室別開銅盤異饌將以勵之而龍翔桂挺方之荀賓友于觀摩之力也小有過差不為譙讓潛自改省無傷和氣焉公豐頤便腹朗目脩眉聲如洪鐘每酒酣耳熱引目微盼掀髯宣吐謔浪唾咳文采煥發聽者咸避其鋒歲時伏臘薦享虔肅至敦睦宗姻蒙舉火之惠矜卹孤寡殫分宅之仁人有緩急力能解紛事有不平慷慨為理獎拔善類揜護瑕疵皆人所莫能及也所著有說守問馬集仁恕堂日錄玉涵

堂集明珠集防敵論及序記碑銘若干卷行於世重修
宋史殺青未就以俟後人字學虞歐稍變戈法詞宗晁
晏尤長小令下筆輒成倚馬可待得之者列開府之屏
題叢山之簾照乘揜輝徑尺非寶也卒之時朴承諱自
京數千里徒步來奔蒙犯霜露不浹月而抵帷堂一慟
幾絕孝行若此公其有子哉越明年甲子閏二月十日
偕弟儉等奉公柩權厝於陽山文瑞公賜塋之側俟吉
乃葬彭徵君狀其事王岳伯著為銘互闡幽光都無遺

絢矣謂余與公最為相知司直兄子復嬪於儉兼有世
睦之好屬余表之夫萬石孝謹公儷其醇太丘長者公
驂其風顏氏義方公迪其訓河陽拙宦公戒其多子長
史才公纂其緒少陵詩律公嗣其響從公游者易名於
蓋棺稽法於史氏諡曰貞毅不亦宜哉系曰延陵亮節
千載以還德徽匪墜季仲之間鴻筆色絲刊石永堅余
表其大揭之名山

明吏部文選清吏司員外郎王君墓表

吏部文選員外郎王君卒其門生陸尚寶師道狀其行
友人王參議庭為之銘足以闡懿生平垂休來葉矣諸
孤謂余與君乙酉同舉於鄉己丑同升於朝交最篤而
知更深也謂表其顯且大者聊補誌狀所未備云君諱
穀祥字祿之惟辛酉君以降而上世嘗頌酉室者適符
其生因題其居而自稱酉室云系出大原晉末徙閩之
福清唐水部榮為世譜載其先大雅慎微皆起進士傳
至八世祖仲舉贈奉議郎始遷吳之長洲生蘋仕宋為

著作郎中大夫生敏精於醫生觀能世其業即君之父也子孫守其方書往往全活人吳中稱醫家者流必首王氏云君生而器雅童烏之齡即能屬文樂安之歲選充縣學弟子員文恪王公一見奇之曰吾宗千里駒殆此子矣時文待詔蔡孔目尚在諸生中引為忘年交二王諸袁以才齊名既舉進士改翰林庶吉士先帝疑政府私樹桃李詔悉罷之乃授工部屯田司主事少宰徐文敏公乙酉座主也薦調考功尋署文選員外遇正郎

缺暮月不拜謂君明慎銓藻咸當其人力足攝也時太宰為婺源汪公鉉專伺政府賢不肖一切倒置選法幾壞君每與忤將中傷君君稍覺乃以母老不便北土乞歸侍養而忘其有兄不得輒引是例命下予告仍勅按院覈之遂出貶真定尉棄不拜兄穀禎尚官嶺南郡幕先有傳其物故者妄也嗟乎為母承譴無忝人子矣時廊子汴王子慎中任子瀚唐子順之並以才居吏部不利為伍君行而諸子亦相繼謝去鄒陽入朝見嫉之言

固不驗耶後周恭肅公故吏部少宰也再召入京謂汪
曰公不足王子者奚故汪曰本部左遷非止一人彼獨
薄尉者非矯耶周笑曰公謬矣員外初以母不便於北
土真定去京師纔數百里獨能安耶既以母老乞歸今
可捨之而身自之官耶是猶欲其出而閉之門也江浙
間寧無散郡可迎養者乎公領之意終不釋而君亦矢
心不復仕矣亡何太安人背養居喪敦禮以父事兄以
母奉寡妯友睦益天性也杜門却掃委懷圖史絕戀紛

華既無塵網之嬰亦無山水之好有田在東郭外課農
自給殷春閒耕迨冬納稼間一往與田父老談笑移日
不知為吏部郎也胡安人亦時往饁之君曰昔介子與
母偕隱龐公將婦以遊向恨失之綿上今幸得之鹿門
矣撫按諸司交相推薦疏累上未報厥後太宰為甌寧
李公默己丑房考也素重君諷御史特疏舉君又移書
所司為趣駕終不赴時倭夷構亂兵火戒嚴人皆以墳
墓妻子為念奚暇計爵位哉安人痛姑之亡鬱鬱喪明

君素不畜妾媵躬視家事雖洒削胃脯酒漿之瑣悉理
周密或以此少之而君恬不恤也君既不出而李公竟
坐讒死世益賢智君矣今上嗣位簡用先帝舊臣君業
已補尉大名至是超拜南京文選主事地近而易即僉
謂由此可立致崇顯而君稱疾堅不就衆為惜之而陸
君由南儀曹起僅遷尚寶君殆有見也郡守永年蔡公
甫下車首書清德表其里枉駕造其廬坐牀第間相勞
苦君口不能語咄咄書空稽首作謝狀里中嗟歎謂賢

哉蔡侯也隆慶改元丁卯春二月十二日安人胡氏卒
君震悼幾殞五內俱傷又力疾為治喪事痺遂劇非樂
石刀圭可緩息也越明年戊辰九月九日卒七十稀年
未躋二稔耳悲哉先是文待詔方負重名吳人士多因
之起譽君尤所親愛其所否者余安定與黃江夏耳君
為詩冲澹而不尚綺靡文亦典雅有則書倣晉人不墜
右軍大令之風寄興丹青追工庠詰之技篆籀八體並
臻妙品晚抱書癖手自抄錄無間寒暑讐校魯豕畧無

脫誤雖大亮之百卷繕寫子孺之三篋刊亡曷過焉今
張燕公陸放翁曾南豐三集南唐書野客叢書手澤猶
存所纂郡學志并著詩文若干卷行于世君性整潔不
為苟簡室中器物置必有恒所衣服巾履雖敝無點膩
可泚足跡未嘗入公府有以事干請者挹其風槩不復
敢言客有詆人短者以他語亂之慙色而去自唐宋以
降數百年遺像封誥璽書之類必加寶護此外無長物
也子男三長仲友國子生次仲恭郡學生季仲序孫男

四婚娶皆名族詳具誌中茲不載君亦可以不死矣是
歲十二月二十八日卜吉祖塋旁仲友等奉二棺合葬
云司勳氏曰若王員外者表署於鄭鄉稽評於月旦勒
有道之碑展季子之墓易名斷諡其在陶趙間乎夫嗇
君者年完君者天夷清而聖減節而賢嗚呼先生之清
節足以起懦激廉矣靈巖之境橫山之巔白楊蕭蕭爰
起新阡灼灼桃鵝夫人從焉奮猷樹烈後其考旃

明奉訓大夫知夷陵州蔣君墓表

夷陵刺史蔣君卒其友人徐隱君鱗狀其事同年林太史公樹聲為之銘亦足考裔於往牒流輝於來葉矣元子太學生宇志猶欲表其墓乃請於司勳氏將以昭潛德而永孝思志誠可嘉矣夫包山之陽消夏之灣堂而封者大夫之阡歟君諱球玉字國華別號平邱生其先自成周時封旦子伯齡于蔣以國為氏傳至漢山亭卿澄宋戈陽之奇皆以通侯顯子孫散處河洛間高宗時司樂階危蹕南渡始居毘陵載徙包山遂為吳人云曾

祖渾祖旻父軫皆褐玉韜光因山修業有桑麻橘柚之
饒比素封焉伯父詔武廟時登辛巳進士超拜御史稍
復其始君生而英敏絕倫八歲誦詩書二七善文辭嘗
攜之母家外曾王父翰林蔡公一見器之曰繼侍御者
此兒矣弱冠博極羣書咸通大義補鄉校弟子員試輒
居諸生右里中鉅室爭遣子弟從之遊今上改元庚子
歲當比領薦南畿後屢試春官不第歎曰吾自謂下筆
言妙天下取青紫若俛拾地芥然阨於數奇非文之罪

也裘敝金殫鬢凋顏改不復能與少年馳逐矣且古人或以推擇垂勲或由辟舉熙績奚必區區一第乎甲子謁選銓曹先是夷陵缺守荆楚方有戎事地當巴蜀孔道素稱繁劇難理天官氏廉得君才乃就闕下拜為夷陵刺史一命而為大夫朱旛皂蓋握銅符而綰銀艾亦足為榮矣捧檄歎曰豈不懷歸畏此簡書我之謂矣暫圖將母而後之官未晚也乃戴星叱馭扶疾遄征渡江愈革竟卒於舟中去家僅百里乃不克死於牖下天乎

命哉年纔五十有六耳宇志嘗遊太學司成而下若博
士掌故咸敬禮之曰是平丘子耶蔣氏代不乏人矣諸
孫並森森秀發君其不死哉詳具志中或曰大夫未嘗
莅官臨民展采錯事曷用表之司勲氏曰昔仲子以懿
行表鄉萬石以醇謹範族故刑于之化可以御邦孝友
之善是同為政詩書所稱曷戾焉君處兄弟間推財讓
產取老甘瘠家賴舉火戶蒙燔券者多矣又好為然諾
專務趨人之急包山去城府頗遠湖卒風濤險莫可涉

人有忿爭不聽於邑令而折於君之一言倭夷犯山中
君出數千緡召募義勇授以奇策一境獲安山有津曰
鎮下水潦泥壅舟觸輒覆乃捐橐中百餘金修治之民
免於患以此數端往試一州則其興鄭國之渠弭渤海
之盜空太丘之獄棄高陵之田何有哉而今已矣天不
助楚殲爾父母悲乎夷陵之民聞訃輟春罷市曰祀子
產於東里葵朱邑於桐鄉吾儕小人敢忘茲義乃想魂
流涕而為招曰坎坎伐鼓傿傿屢舞我歌惟此侯侯沱

浦侯之來兮完襦與袴侯之不來兮捨斯及斧生不蒙
其澤兮死願受其祜余既表其事并采其言書於墓石

皇甫司勳集卷五十六